

*Islamska zajednica se brine o islamskom odgoju i obrazovanju svojih pripadnika i zalaže za očuvanje vrijednosti braka i porodičnog života – citat je iz člana 9. Ustava Islamske zajednice u BiH iz 1997. godine.*

Bosanskohercegovačko tranzicijsko društvo u cjelini evidentno se suočava, između ostalog, i sa krizom porodice. Iz teksta Ustava IZ u BiH, ali i drugih radnji koje poduzimaju strukture IZ, vidi se da postoji volja i htijenje za očuvanjem vrijednosti braka i porodičnog života. Štaviše, može se reći da je briga za bračni i porodični život, za njegovu kvalitetu i zdravlje, načelno, u samom vrhu misijskog djelovanja Islamske zajednice. Očuvanje i izgrađivanje zdravog društva u cjelini, a samim tim i zdravog džemata kao srca cijele Islamske zajednice, ovisi o tome koliko su zdrave porodice koje čine džemate. Zdrav život šire društvene zajednice umnogome zavisi o postojanosti i kvaliteti porodičnog života. S obzirom na važnost porodice za svako društvo, pa tako i naše, vrijeme je da se otvori razgovor o odgovornosti, obavezama i pravima Islamske zajednice prema, prije svih, njenim članovima na planu usmjerenih i konkretnih akcija u cilju poboljšanja i očuvanja porodičnih vrijednosti.

Ako se izuzme prilježan rad imama u džematima, Islamska zajednica, trenutno nema konkretan ujednačen program pomoći porodici u krizi. Jasno je da je prije pokretanja ovakvog programa, potrebno pristupiti izradi planske i sistematske strategije djelovanja na ovom planu, i da će za nju trebati stotine sati rada, kako bi polučila plodnosnu i uređenu konkretnu pomoć onima kojima je potrebna.

Način na koji će to Islamska zajednica u budućnosti domisliti, organizirati i realizirati, ovisit će o mnogo faktora, ali zahtjev vremena i potrebe članova i pripadnika Islamske zajednice pokazuju da bi trebala, i to što prije, ovaj proces otvoriti i posvetiti se ovom važnom segmentu njezina djelovanja u društvu.

Za bosanskohercegovačko društvo važan je svaki doprinos poboljšanju prilika i ambijenta za izgradnju zdrave porodice, a Islamska zajednica osnivanjem centara za porodicu – jednim od segmenata brige za porodicu, može dati konkretan doprinos društvu. Porodica u krizi mora biti briga širih društvenih struktura, a Islamska zajednica u BiH može biti važna karika u zajedničkom naporu i radu, prvenstveno u promicanju vrijednosti porodičnog života.

Zbog svega navedenog, značajan dio sadržaja ovog broja Novog Muallima posvetili smo ovoj temi.

Vašoj čitalačkoj pažnji preporučujemo i druge zanimljive tekstove koje donosimo u ovom broju.

Senada TAHIROVIĆ